

Powšitkowne WOZJEWJENJA

njedźelu, 10. junija 2018

Běh wo pokal zbóžneho Alojsa

Składnostnje lětušich 75. posmjertnych narodnin zbóžneho kapłana Alojsa Andrickeho su sportowcy wšěch starobnych skupin wot šěsć lět na běh wo pokal k jeho česći sobotu, 23. junija, do Radworja přeprašeni. Započatk na nawsy je za běharjow staroby wot 6 do 15 lět w 9.30 hodź., za tamnych w 10.30 hodź. Běhač budže so po starobje rozdźelnje na čarach po 500, 1.000, 1.500 a 6.000 metrach. Přeprašeni su jednotliwcy runje tak kaž cyłki, na přikład šule, wosadne kružki, sportowe jednotki a wjesne kluby. Na běh wo pokal zbóžneho Alojsa přeprašuju Towarstwo Cyrila a Metoda z.t. (TCM), Sportowa jednotka 1922 Radwor, wjesna skupina strony CDU, Radworska gmejna a Radworski młodžinski klub. Zajimcy měli so hač do pjatka, 15. junija, za běh přizjewić, po móžnosći z mailku na Katolski@Posol.de abo telefonisce w redakciji Katolskeho Posoła pod čisłom (0 35 91) 55 02 12. Jědź a napoje budu so tam poskićeć. Čary powjedu po asfaltowym runje tak kaž po pólnym a lěsnym puću.

Wulět samostejacych

Wulět samostejacych ze serbskich wosadow budže štwórtk, 21. junija, a powjedže na hnadowne městno Krzeszów w Pólskej. Zajimcy njech so hač do póndzele, 11. junija, w redakciji Katolskeho Posoła přizjewja, telefonowe čisło (0 35 91) 55 02 12. Časy wotjězda busa z jednotliwych wsow so njedźelu do wulěta w Posole wozjewja.

Duchowny koncert

Chór 1. serbskeje kulturneje brigady z.t. přeprašuje lubowarjow duchowneje hudźby na swój koncert tutu njedźelu, 10. junija, w 16 hodź. do putniskeje cyrkwy w Róžeńće. Zaklinča twórby Brucknera, Kocora, Nagela, Pilka a dalších komponistow.

Klóšterski swjedzeń

Z Božej mšu zahaji so klóšterski swjedzeń njedźelu, 17. junija, w 10.30 hodź. w cyrkwi klóštra Marijineje Hwězdy w Pančicach-Kukowje. Po kemšach wočakuje wopytowarjow pisany program. Tež Towarstwo Cyrila a Metoda z.t. změje na klóšterskim swjedženju swójske stejnišćo. Z ekumeniskim nyšporom w 17.30 hodź. so swjedzeń zakónči.

Spěwohra „Smjertnica“ zaklinči w Smochćicach

Składnostnje 160. narodnin Jurja Pilka předstaja solisća, chór a orchester Serbskeho ludoweho ansambla kaž tež Radworski chór Meja njedźelu, 17. junija, w 15 hodź. jeho spěwohru „Smjertnica“. Zdobom zaklinča na tutym koncerće na dworje Domu biskopa Bena w Smochćicach wšelake chórowe twórby Pilka a hudźbne wobdźělanja ludowych spěwow. Cyłkowny nawod změje Andreas Pabst.

Po koncerće su wšitcy přeprašeni, sej koparsku hru mustwa z Němskeje přećiwo Mexiku zhromadnje na wulkej widejowej scěnje wobhladać.

25 lět Hornjołužiski zwjazk Carity z.t.

Hornjołužiski zwjazk Carity z.t. přeprašuje składnostnje swjeho 25lětneho wobstaća na swjedzeń pjatk, 22. junija, do Budyšina. W 12 hodź. so swjedzeń na Mjasnych wikach mjez Pětrowej cyrkwju a radnicu zahaji, k čemuž změja mjezynarodny přikus spřihotowany. W 13 hodź. přizamknje so podij „Mjezynabožinska koaliciona“ w tachantskej cyrkwi, na kotrymž wobdźěla so rabi Alexander Nachama z Drježdźan, imam Kadir Sanci z Berlina, Šerachowski farar Martin Prause z předsydstwa Hornjołužiskeho zwjazka Carity a Hubertus Staudacher, społnomócnjeny Erfurtskeho biskopstwa za islam. Moderator budže nawoda Budyskeho šulskeho centruma, dr. Bertin Rautenbach. W 15 hodź. je swačina a w 16 hodź. swjedženska Boža mša w tachantskej cyrkwi.

„Mjenje stresa – wjace wjesela“

W Domje biskopa Bena w Smochćicach ma so w třecim tydženju lětnich prózdnin wot póndzele do soboty, 16. do 21. julija, swójbny tydzeń pod temu „Mjenje stresa – wjace wjesela“ wotměć. Staršim z dźěćimi wot třoch lět poskićuja tam móžnosć, we wšelakorych seminarach nastorki za wšedny dzeń w swójbje dóstać. Při tym póndže wo respektny kubłanski stil, wo wid na potřebnosće dźěći a młodostnych kaž tež wo to, na kotre wašnje móža starši na mylace zadžerženske wašnja přiměrjenje reagować. Kubłanske dny wobsahuja tohorunja pisany wólnočasny program. Nadrobne informacije dóstanu zajimcy pod telefonowym čislom (03 59 35) 2 23 17.